

Državna služba u Federaciji ne treba postati nepotrebno ispolitizirana



Visoki predstavnik i specijalni predstavnik EU Valentin Inzko i Boris Iarochévitch iz Delegacije Evropske unije u BiH sastali su se danas u Sarajevu sa kolegijima Doma naroda i Zastupničkog doma Federacije BiH kako bi razgovarali o mogućim posljedicama ukoliko Parlament FBiH usvoji predložene izmjene i dopune Zakona o državnoj službi i Zakona o organizaciji organa uprave u FBiH u formi u kojoj ih je usvojila Vlada FBiH.

Visoki predstavnik i specijalni predstavnik EU Inzko je izrazio ozbiljnu zabrinutost zbog mogućnosti da, ukoliko budu usvojene, ove izmjene i dopune naruše ono što je ostvareno reformom javne uprave u Bosni i Hercegovini, te da ukidanje statusa državnih službenika za šefove nezavisnih tijela, uprava i organizacija – kao što to predložene izmjene i dopune predviđaju – u stvari znači da te pozicije neće postati ništa drugo do politička imenovanja.

On je upozorio da će biti poništen temeljni princip profesionalnosti i političke neutralnosti koji leži u osnovi reforme javne uprave, ukoliko ove ključne pozicije budu politička imenovanja, umjesto da se na njih postavljaju pojedinci odabrani na osnovu stručnosti.

Visoki predstavnik i specijalni predstavnik EU Inzko obavijestio je oba Kolegija Parlamenta FBiH da bi usvajanje ovih izmjena i dopuna predstavljalo korak nazad u procesu

evropskih integracija kao i daljnji korak nazad u pogledu usklađivanja Zakona o državnoj službi u BiH, što je prvenstveni cilj procesa reforme javne uprave koji je u toku.

«Ukoliko ove izmjene i dopune budu usvojene, državna služba u FBiH bi postala nepotrebno ispolitizirana i to se ne bi trebalo desiti», rekao je visoki predstavnik i specijalni predstavnik EU Inzko.